

Тақводорлар учун тайёрланган мукофот



20:14 / 26.03.2018 5146

Роббининг ҳузурида туришдан қўрққанлар учун икки жаннат бор.

Қиёмат куни Парвардигори оламнинг ҳузурида саволларга жавоб беришдан, ҳисоб-китоб мақомидан қўрқиб, тириклигидаёқ тайёргарлик кўриб, яхшилик билан кун кечирганларга икки жаннат бор экан.

«Икки жаннат»нинг бир неча шарҳлари бор, жумладан, инсонларга алоҳида жаннат, жинларга алоҳида жаннат ёки икковларидан ҳар бирларига иккитадан жаннат. Гуноҳкорлар жаҳаннам билан ўта қайноқ сув ўртасида айлансалар, тақводорлар биринчи жаннатлари, яъни боғлари билан иккинчи жаннатлари – боғлари орасида сайр қилиб юрадилар. Яъни роҳат устига роҳат, фароғат устига фароғат.

«Роҳман» Бас, Роббингизнинг қайси неъматларини ёлғонга чиқара олурсиз?!

«Роҳман» У(жаннат)лар шох-новдалидирлар.

Яъни у иккала жаннат сердарахт бўлиб, дарахтларининг шох-новдаларида мева-чевалар сероб ҳамда бу сершох, серновда дарахтлар соя-салқинлик манбаидир.

«Роҳман» Бас, Роббингизнинг қайси неъматларини ёлғонга чиқара олурсиз?!

«Роҳман» Икковларида икки оқар булоқ бор.

Жаннатийлар ичишлари учун ва дарахтлар тагидан оқиб туриши учун мазкур икки жаннатда оқувчи икки булоқ бўлиб, уларда сув сероб бўлади.

«Роҳман» Бас, Роббингизнинг қайси неъматларини ёлғонга чиқара олурсиз?!

«Роҳман» Икковларида ҳар мевадан жуфт навлар бор.

Яъни мазкур икки жаннатда меваларнинг жуфт-жуфт хил навлари бор. Бу ҳам жаннат аҳлининг роҳатлари, кўнгилхушликлари тугал бўлиши учун Аллоҳ томонидан берилган неъматдир.

«Роҳман» Бас, Роббингизнинг қайси неъматларини ёлғонга чиқара олурсиз?!

«Роҳман» Астарлари истабрақ(қалин ипак)дан бўлган тўшакларга ёнбошлаган ва икки жаннат мевалари яқин бўлган ҳолларида...

Жаннат аҳли ипак астарли тўшакларга ёнбошлаган ҳолда истироҳатда бўлар эканлар. Жаннат ичидаги икки боғнинг мевалари уларга яқин бўлиб, ўтирган ҳам, турган ҳам, ёнбошлаган ҳам қийналмасдан узиб олиб, баҳам кўраверар экан.

«Роҳман» Бас, Роббингизнинг қайси неъматларини ёлғонга чиқара олурсиз?!

«Роҳман» Уларда нигоҳини тийган, аввал инс ҳам, жин ҳам тегмаган (ҳур)лар бор.

У тўшакларда жаннат аҳли учун тайёрланган ҳурлар бор. Улар афифалар бўлиб, ўзларига соҳиб бўлган жаннатий шахсдан ўзгага кўз тикмайдилар, хаёллари ҳам бошқа ёққа кетмайди. Шу билан бирга, улар мастура бўлиб, ўзларига соҳиб бўлган жаннатий шахсдан аввал бирорта жиннинг ҳам, инсоннинг ҳам қўли тегмаган.

«Роҳман» **Бас, Роббингизнинг қайси неъматларини ёлғонга чиқара олурсиз?!**

«Роҳман» **У(ҳур)лар худди ёқут ва маржондай.**

Жаннатийларга жуфти ҳалолликка тайёрлаб қўйилган ўша ҳурлар беғуборликда ва гўзалликда худди ёқут ва маржонга ўхшайдилар.

Шайх Муҳаммад Содиқ Муҳаммад Юсуф

(Тафсири Ҳилол китобидан)